

21 JUN 2002

Syed Hamid-Air

MALAYSIA TIDAK MAHU TERUS DIHANTUI MASALAH AIR KE SINGAPURA

KUALA LUMPUR, 21 Jun (Bernama) -- Malaysia berharap Singapura akan bersikap terbuka berhubung isu bekalan air dalam mencapai kata sepakat dalam soal berkenaan, kata Menteri Luar Datuk Seri Syed Hamid Albar hari ini.

"Malaysia tidak mahu terus dihambat dan dihantui oleh masalah air," katanya kepada pemberita pada Perhimpunan Agung Umno 2002 di Pusat Dagangan Dunia Putra di sini.

"Kalau Singapura mempunyai sikap terbuka dan hendak mencapai satu kata sepakat kita boleh menggerakkan perhubungan kita dengan memandang ke hadapan dan tidak menoleh ke belakang," katanya.

Syed Hamid bagaimanapun yakin kedua-dua pihak akan mencapai kata sepakat mengenai formula harga bekalan air ke republik itu pada pertemuan Menteri Luar kedua-dua negara di sini pada 1 dan 2 Julai ini.

Dalam pertemuan itu, Kuala Lumpur dijangka mencadangkan formula untuk mengelakkan pertikaian pada masa depan berhubung harga bekalan air sebagai tumpuan utama selain pakej isu-isu tertangguh yang lain.

"Saya fikir sekiranya kita boleh mencapai kata sepakat mengenai air, perkara-perkara lain akan menyusul...tiada masalah...air merupakan isu utama dan asas," katanya.

Syed Hamid berkata beliau akan memaklumkan kepada rakan sejawatannya dari Singapura pada pertemuan itu mengenai kenapa dan bagaimana Malaysia merumuskan formula itu.

"Kita lihat bagaimana kita boleh lakukan sesuatu yang dapat dipersetujui kedua-dua belah pihak...kedua-dua belah pihak boleh bersama-sama membincangkan butirannya," katanya.

Beliau berkata republik itu akan diberikan jaminan bahawa apa jua harga yang ditawarkan oleh Malaysia adalah berdasarkan pasaran.

"Kita telah merumuskan kos alternatif mengenai apakah jenis air yang akan dibekalkan ke negara lain, berapa kosnya...sekarang ini kita mahu menyemak semula harga yang sepatutnya telah kita lakukan pada 1986/87," katanya.

Singapura buat masa ini membeli bekalan air mentah yang dibekalkan oleh Johor pada kadar harga 3 sen bagi setiap 1,000 gelen (4,500) liter.

Republik itu pernah mencadangkan harga air mentah yang dibeli dari Johor dinaikkan kepada 45 sen bagi setiap 1,000 gelen tetapi tidak dipersetujui Perdana Menteri Datuk Seri Dr Mahathir Mohamad.

-- BERNAMA

AKT AZZ RHM